

## DOMENIE XXII «VIE PAL AN»

### Jutoris pe Liturgjie

Domenie, al prin di Setembar dal 2019

*Al è inutil che noaltris o stedin a fâ grancj studis su lis peraulis dal Signôr dal vanzeli di vuê, che si metedin a discuti di dignitât, di titui, di precedencis, di sentis, di colôrs e di riceviments... La veretât e je une sole: se o sin ancjemò in grât di scoltâ une cussience limpide, se o rivin a lei la storie tragjiche dome dal secul passât, se o cjalìn a ce che al sta sucedint cul voli dai piçui e dai fruts, se o vin la libertât di pensâ come personis maduris, la sentence e je clare: Va a metiti tal ultin puest. E se ancje i studis par lâ su Marte, o par rivâ al gjenome, o fin al Big Beng o a la inteligjence artificiâl o a la robotiche nus esaltin “a sintîsi super di super”, par plasê: Va a metiti, di gnûf, tal ultin puest. Al scriveve Pierre Teilhard de Chardin tai agns trente dal secul passât: Fra i progrès maraveôs che o viodìn, l’om al è però restât come cussience etiche ai temps de Ete dal clap (semplificant a la largje, fra i doi milions e mieç di agns indûr e i 8.000 -5.000 p.d.C). Cjalant a la cussience etiche, politiche, economiche, sociâl di vuê, no viôt che o vebin fat grancj progrès.*

*Al à reson il Signôr: Om, par plasê: Va a metiti, ancje vuê, tal ultin puest.*

#### Antifone di jentrade

cf. Sal 85,3.5

**V**e dûl di me, Signôr,  
ch’o ai berlât viers di te dute la zornade:  
tu tu sês bon, Signôr, e tu perdonis,  
tu sês cjamât di boncûr cun ducj chei che ti clamin.

#### Colete

Diu di ogni perfezion, ch’al è to dut ce che di miôr al è tal mont,  
semene tai nestrîs cûrs l’amôr pal to non,  
nudrîs in nô, cul cressi de fede, dutis lis robis buinis  
e, cul nestri impegn, vuarde ce che tu âs nudrît.  
Pal nestri Signôr Gjesù Crist to Fi, ch’al è Diu  
e cun te al vîf e al regne dutune cul Spirtu Sant,  
par ducj i secui dai secui.

#### PRIME LETURE

Sir 3,17-18.20.28-29

**Tu âs di sbassâti, cussi tu gjodibli ce tnt biel al dis il salme:jatarâs grazie denant dal Signôr.jerusalem**

*Ce tant bieles che e je cheste perle dal libri dal Fi di Sirach (Gjerusalem, II secul p.d.C.), e ce tant valide te nestre societât che si autoproclame libare di mandâ, di rispundi, di sentenciâ, di ofindi, di inventâ cualsasi mes e di sparniçâ ben e mâl dal moment midiant di telefonins e di altris tecnichis multimediâls... Ormai ducj sa, ducj pontifiche, nissun al è ignorant e ducj o vin reson.*

*Fi, fâs lis tôs voris cun modestie, cîr di vê sâl in cjuce e di cjararâ cun rispiet, competence, bon sens e umiltât.*

**Dal libri dal Fi di Sirac**

Fi, fâs lis tôs voris cun modestie,  
parcè che ti volaran plui ben a ti  
che no a di chel ch'al fâs regâi.  
Plui grant tu sês e plui tu âs di sbassâti,  
cussì tu cjatarâs grazie denant dal Signôr.  
Lui al cjape glorie dai piçui.  
Il cûr dal savi al pense su lis parabolis,  
une orele atente, chê e je la sô brame.  
L'aghe e distude il fûc ch'al art,  
cussì la caritât e pare jù i pecjâts.  
Peraule di Diu.

### SALM RESPONSORIÂL

dal Salm 67

*L'originâl, il salm 68 dal Salteri, al è tant plui lunc, complicât e di dificile, svareade interpretazion. La liturgjie e à cjolt versets ca e la e ju à dâts dongje sot dal ritornel: Tu sês tu, Signôr, il Pari dai umii. A son culî pinsîrs che nus judin a metisi in umiltât al nestri puest di creaturis par dâ su cjants di gjonde denant di Diu.*

#### **R. Tu sês tu, Signôr, il Pari dai umii.**

*Se cjantât: Il cjant dai salms responsoriâi, p. 248.*

I juscj s'indalegrin  
e a son contents denant di Diu,  
e a dan sù cjantis di gjonde. **R.**

Cjantait a Diu, fasêt al so non une cjante;  
«Signôr» al è il non che lui al puarte:  
gjoldêt a la sô presince. **R.**

Pari dai vuarfins e vuardean des veduis,  
chest al è Diu te sô sante cjase.  
Diu al torne a menâ a cjase chei che si jerin pierdûts  
e al mene i presonîrs te bondance. **R.**

Tu ur âs dade ploie, Diu, fin che ant vevin avonde;  
tu i âs tornât a dâ spirt a la tô ereditât sfinide.  
Il to trop alî si jere sistemât,  
e tu, Diu, cu la tô robe il biât tu sostentis. **R.**

### SECONDE LETURE

Eb 12,18-19.22-24

**Vualtris si sês svicinâts a la mont di Sion e a la citât dal Diu vîf.**

*La letare nus ripuarte un paragon fra il Diu dal Vieri Testament viodût come: fûc... cinise... scûr... fumate... burlaç ...sunôr de trombe... sunsûr di peraulis... Diu di spavent che a sconzuravin no ur fevelàs plui... e il Diu che nus palese Gjesù:... Diu vîf ... agnui... cunvigne de fieste... semlee dai segnâts tai cîi... spirts dai juscj... e Crist nestri fradi Mediatôr dal Gnûf Pat. E je propit cheste la muse dal Diu che nô o cirin: un Pari che nus capîs, che nus da sperance, che nus sburte a lâ indevant cun fiducia fra i alts e bas, i moments bieî e lis solitudinis suturnis de vite.*

#### **De letare ai Ebreos**

Fradis, vualtris, no si sês svicinâts a robis che si tocjin ni a un fûc ch'al pare in cinise ni al scûr, a la fumate e al burlaç, ni al sunôr de trombe o a sunsûr di peraulis, biel che chei che lu scoltavin a sconzuravin che Diu no ur fevelàs plui.

Vualtris si sês svicinâts a la mont di Sion e a la citât dal Diu vîf, a la Gjerusalem dal cîl e a miârs di agnui, a la cunvigne de fieste e a la semblee dai prins fis segnâts tai cîi, al Diu judiç di ducj e ai spirits dai juscj refinîts fint insomp, al Mediatôr dal Gnûf Pat.

Peraule di Diu.

## CJANT AL VANZELI

Lc 4,18

### R. Aleluia, aleluia.

Il Signôr mi à mandât

a puartâur la buine gnove ai puars,

a contâur ai presonîrs ch'a son libars.

### R. Aleluia.

## VANZELI

Lc 14,1.7-14

**Chel che si alce al vignarâ sbassât, e chel che invezit si sbasse al vignarâ alçât.**

*Il fat al sarâ sucedût e al varâ vût lis riflessions di Gjesù che cumò Luche lis staronze pe situazion de sô comunitât. Ma noaltris no podaressin acetâ un Mestri che ti insegne lis furbiziis di metiti tal ultin puest par che...*

*Seont i studiâts culî al è ben descrit il galateu de societât passude dai timps di Gjesù... e di vuê.*

*Di fat la superficialitât che e baline tal aiar e che o respirin, nus convinç a vê dirit a la prime peraule e al prin puest, a fâsi valê e a vê simpri reson cui risultâts di chei puars spetacui che nus vegnin butâts in muse ancje te politiche e te democrazie che o stin assistint e che a menin dome aviliment.*

*Gjesù nus vise: Cîr di vê sintiment e di no lassâti cjapâ dentri tai aiarons di supierbie che a svintin di ogni bande.*

*Il secont avertiment di Gjesù al è plui che clâr ancje pe nestre glesie, pes nestris colaboracions pastorâls, pai progjets diocesans: cuant che tu âs di fâ alc di grant invide a lis tôs riflessions personis come i puars, strupiâts, çuets e vuarps e met par prins i ultims dai nestris paîs, fidanti dal Spirtussant che Diu al à ponût in lôr. E tu sarâs furtunât. Di fat e començarâ za di cumò te nestre glesie la resurezion a gnove vite, il premi riservât te resurezion dai juscj.*

## Dal vanzeli seont Luche

Une di Gjesù al jere jentrât in cjase di un dai socestants dai fariseos par mangjâ un toc di pan e lu tignivin di voli. Viodint che un pôcs di invidâts a sielzevin i prins puescj, Gjesù ur contâ une parabule: «Cuant che un ti invide a gnocis, no sta metiti tal prin puest, parcè che al podarès jessi invidât un plui impuartant di te; in chest câs, chel che ti à invidât al scugnarâ vignî a dîti: Lassii il puest a lui. Alore tu, malapaiât, tu scugnarâs cjapâ l'ultin puest. Invezit, cuant che ti invidin a gnocis, va a metiti tal ultin puest. Cuant che al rivarâ chel che ti à invidât, ti disarâ: Amî, ven, cjapiti un puest miôr. Alore tu podarâs tignîti in bon denant di ducj i gnoçârs. Di fat chel che si alce al vignarâ sbassât, e chel che invezit si sbasse al vignarâ alçât».

Po i disê a di chel che lu veve invidât: «Cuant che tu ufrissis un gustâ o une cene, no tu âs di invidâ i tiei amîs e fradis, ni i tiei parincj, ni i siôrs ch'a son a stâ dongje di te; di fat chei li a puedin tornâ a invidâti e cussi ti ven tornât il plasê. Invezit, cuant che tu ufrissis un gustâ, tu âs di invidâ puars, strupiâts, çuets e vuarps; e tu sarâs furtunât parcè che lôr no an la pussibilitât di tornâti il plasê. Di fat ti vignarâ tornât te resurezion dai juscj».

Peraule dal Signôr.

### Su lis ufiertis

Cheste sante ufierte nus siguri simpri, Signôr,  
la tô benedizion e la tô salvece  
e cu la sô fuarce e colmi ce ch'e opere intal misteri.  
Par Crist nestri Signôr.

### Antifone a la comunion

Sal 30,20

Cetant grant ch'al è, Signôr, il to boncûr!  
Tu lu tegnîs di bande par chei che ti temin.

### Daspò de comunion

Nudrîts cul pan dal cîl, ti prein, Signôr,  
che chest sostentament dal to bonvolê al rinfuartissi i nestris cûrs  
e nus sburti a servîti intai nestris fradis.  
Par Crist nestri Signôr.

### Cjants

Libri *Hosanna*, sot il titul *Eucaristie*: messe, benedizion eucaristiche, rîts e cjants; dal n.7 al n.62  
comprendût.

\* \* \*

*Voglio una chiesa povera per i poveri. Essi hanno molto da insegnarci. Oltre a partecipare al  
sensus fidei, nelle loro sofferenze conoscono il Cristo sofferente. E' necessario che tutti noi ci  
lasciamo evangelizzare da loro... riconoscere la forza salvifica delle loro vite... metterli al centro...  
scoprire Cristo in loro... prestare la nostra voce nelle loro cause... essere loro amici, ascoltarli,  
interpretarli e riconoscere la sapienza che Dio vuole comunicare attraverso di loro.*

Peraulis di pape Francesc in: "Lettera di solidarietà ai popoli in lotta".

\* \* \*

\* *I salms e cjantadis a vegnin ripuartâts cu la numerazion dal libri: Hosanna, Cjants e preieris dal popul  
furlan, Ed. Glesie Furlane, 2012.*

\* *Il cjant dai salms resposoriâi, Ed. Glesie Furlane, 2012.*

\* *50 corâi de cristianitât todescje voltâts par furlan, ed. Glesie Furlane, 2016.*

\* *Par domandâ chescj libris scrivêt a [info@glesiefurlane.org](mailto:info@glesiefurlane.org)*